

Inatsisartut suleriaasianni § 33 naapertorlugu Inatsisinut Ataatsimiititaliamut ilaasortat matumuu-na aalajangiiffigisassatut siunnersuut tulliuuttoq saqqummiuppaat:

Inatsisartut Ombudsmandiata 2022-mut nalunaarutaata Inatsisartunit tusaatissatut tigune-qarnissaanik Inatsisartut aalajangiiffigisassaattut siunnersut.

(Inatsisinut Ataatsimiititaliaq: Anders Olsen ataatsimiititaliap siulittaasua, Siumut, Emanuel Nûko, ataatsimiititaliap siulittaasuata tullia, Naleraq, Kuno Fencker, Siumut, Asii Chemnitz Narup, Inuit Ataqtigiit, Harald Bianco, Inuit Ataqtigiit)

Tunngavilersuut:

Allaffissornikkut aqutsinerup inatsisini sinaakkusiussat iluanni kiisalu ingerlatsivinni inatsisitigut malitarisassat iluini ingerlanneqarnissaa pillugu Inatsisartut inatsisiliortutut Ombudsmandi nakkutilliisussat suliaqarnissaanik pisussaaffilerpaat. Taamaalilluni Ombudsmandi Inatsisartut Naalackersuisunik nakkutilliinerannut sakkuuvoq, kisiannili aamma nunap innuttaasa eqqartuus-siveqarnikkut illersugaanissaannut qulakkeerinnituulluni. Ombudsmandi taamaalilluni tassaavoq *Inatsisartut innuttaasullu* ataatsimut Ombudsmandiat.

Inatsisartut Ombudsmandiat ukiut tamaasa Inatsisartunut nalunaarusiortarpoq, tassa ukiumi qaangiuuttumi Ombudsmandip suliarisarsimasani nalunaarusiaralugit.

Ombudsmandip 2022-mut ukiumoortumik nalunaarusiaani – maannamut pisarnertut – suliat arlallit malittarisassat tunngavimmi namminerimi imaluunniit malittarisassat allaffissuutigineranni kukkunerit amigaatillu nalunaarutigineqarsimasut ilanngunneqarsimapput.

Ukiuni kingullerni Ukiumoortumik Nalunaarutit aammalu ajornartorsiutit minnerunngitsumik oqartussaasunut Inatsisartunullu soqutiginaateqartut pillugit allaaserisanik ataasiakkaanik imaqartarsimapput.

Taamaalilluni innuttaasut piginnaatitaaffitsigut isumannaatsuutinnissaat pisortatullu oqartussat suliasaminnik suliarinnittarnissaat nukittorsartuarneqaqqullugu anguniagaqarnitsinni ukiumoortumik nalunaarusiaq sakkutut ikiuutitullu atorneqarsinnaavoq.

Aalajangiiffigisassatut siunnersuutip matuma saqqummiunneqannginnerani Inatsisinut Ataatsimiititaliaq Ombudsmandeqarfimmik ataatsimeeqateqarpoq. Ataatsimiinnermi tassani Ombudsmandip inatsisilerinermut pisortaata ukiumoortumik nalunaarusiap imarisaasa ilai ataatsimiititaliamut immikkut soqutiginaatillit ataatsimiititaliamut paasissutissiissutigai.

Kommunit ingerlatsivii suliassa qarfinni tamangajalluinnarni ajornartorsiuteqartut, ukiullu ingerlanerini ingerlatsineq pillugu inatsisiseqartitsineq pillugu suliassa qarfinni annertunerusutigut pitsanngoriaateqartoqarsimangitsoq Ombudsmandi 2021-mut nalunaarummini naliliivoq.

Tamanna tunngavigalugu ingerlatsineq pillugu inatsiseqartitsinerimi maleruagassat tunngaviillu

qitiusut arlallit paasiuminartumik nassuiaataasumik oqartussaasunut ilitsersuusiorniarluni aalajangersimalluni Ombudsmandi (tassa imaappoq Ombudsmandiusiumasoq) 2022-mut nalunaarummini paasissutissiivoq.

Oqartussaasunut ilitsersuut ukioq manna juulimi tamanut saqqummiunneqarpoq aammalu Ombudsmandip nittartagaani takuneqarsinnaalluni.

Taamatut iliuuseqarneq Inatsisinut Ataatsimiititaliamit tikilluaqquneqarpoq!

Kommunit ingerlatsiviini ajornartorsiutit – ilungersunartorujussuit – Ombudsmandimit upararneqartut eqqumaffigniaqqullugit aammalu taakku qanoq iliuuseqarfigineqarsinnaanersut pilugu kommuninik oqaloqateqaqqullugit Naalakkersuisut ataatsimiititaliamit tamatumunnga peqatigitillugu kaammattorneqarput.

Aammattaaq iliuusissanik aalajangersimalluinnartunik kommunit ingerlatsineranni ikorfartuisinnaasunik, taamaalillunilu pisortat sullissinerannik innuttaasullu inatsisitigut illersugaanerannik pitsanngortitsisunik, Naalakkersuisut aallartitsinissaat ataatsimiititaliamit ujarorneqarpoq.

Inatsisinut Ataatsimiititaliap isumaqatigiittup taamatut oqaaseqarluni Inatsisartut Ombudsmandiata 2022-mut nalunaarutaata Inatsisartunit tusaatissatut tiguneqarnissaa siunnersuutigaa.

Ombudsmandip 2022-mut ukiumoortumik nalunaarutaa Vera Lethip kingullertut tunniussarigaa eqqarsaatigalugu Ombudsmandiusimasup 2022-miinnaanngitsoq ukiorpassuarnili Ombudsmandit Inatsisartut sinnerlugit sulisimanermini suliaanut ataatsimiititaliaq tamatumunnga peqatigitillugu qujassuteqarusuppoq.

Aammattaaq Inatsisartut Ombudsmandiata nutaap, Gedion Jeremiassenip, atorfirmik tigusineranut ataatsimiititaliap qujassuteqarfigaa. Sulinerata malinnaaffiginissaa ataatsimiititaliamit qilanaarineqarpoq.